

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-02-9050/24
Tuzla, 09.04.2024. godine

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17), Vlada Tuzlanskog kantona na sjednici održanoj dana 09.04.2024. godine, d o n o s i

ZAKLJUČAK

I

Prihvata se Prijedlog za davanje autentičnog tumačenja člana 6. i 7. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona“, broj: 16/22).

II

Ovlašćuje se premijer Kantona da, u ime Vlade Tuzlanskog kantona, potpiše Prijedlog iz tačke I ovog Zaključka.

III

Prijedlog iz tačke I ovog Zaključka dostavit će se Skupštini Tuzlanskog kantona na razmatranje i dalje postupanje.

DOSTAVITI:

- 1 x Skupštini Tuzlanskog kantona**
- 1 x Ministarstvu unutrašnjih poslova**
- 1 x Evidencija**
- 1 x a/a**



PREMIJER KANTONA

Irfan Halilagić

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-02-9050-1/24
Tuzla, 09.04.2024. godine

TUZLANSKI KANTON
SKUPŠTINA
n/r Predsjednika

Na osnovu člana 165. stav (2) i člana 166. stav (1) Poslovnika Skupštine Tuzlanskog kantona („Službene novine Tuzlanskog kantona”, br. 13/19 i 5/20), Vlada Tuzlanskog kantona, p o d n o s i:

P R I J E D L O G

za davanje autentičnog tumačenja člana 6. i 7. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, broj: 16/22)

Član 6. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, broj: 16/22), utvrđuje:

“(Osnovica za obračun plaće policijskih službenika)

Vlada Tuzlanskog kantona (u daljem tekstu: Vlada Kantona), uz postignuti dogovor sa Sindikatom policije Ministarstva unutrašnjih poslova Tuzlanskog kantona (u daljem tekstu: Sindikat), će utvrditi visinu osnovice od 90% u odnosu na obračun plaće iz člana 8. Zakona o plaćama i naknadama policijskih službenika Federacije Bosne i Hercegovine (“Službene novine Federacije BiH”, broj: 45/10), o čemu Vlada Kantona i Sindikat potpisuju sporazum.”

Član 7. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br: 16/22), utvrđuje:

“(Način utvrđivanja osnovice za obračun plaće)

(1) Osnovica iz člana 6. ovog zakona utvrđuje se prije donošenja Budžeta Kantona za narednu fiskalnu godinu, a primjenjuje se od 01. januara za svaku narednu godinu, koja se usklađuje sa Zakonom o izvršenju budžeta Tuzlanskog kantona, odnosno sa raspoloživim sredstvima za potrebe iz člana 3. ovog zakona.

(2) Ukoliko Vlada Kantona i Sindikat ne utvrde osnovicu iz stava (1) ovog člana, ranije utvrđena osnovica ostaje na snazi do potpisivanja sporazuma između Vlade Kantona i Sindikata, a najduže 90 dana.”

O b r a z l o ž e n j e

Prijedloga za davanje autentičnog tumačenja člana 6. i 7. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br: 16/22)

I. – PRAVNI OSNOV

Ustavni osnov za donošenje autentičnog tumačenja je sadržan u odredbama člana člana 24. stav (1) tačka f) Ustava Tuzlanskog kantona („Službene novine Tuzlansko-podrinjskog kantona”, br. 7/97 i 3/99 i „Službene novine Tuzlanskog kantona”, br. 13/99, 10/00, 14/02, 6/04 i 10/04) kojim je utvrđeno da Skupština Tuzlanskog kantona daje autentično tumačenje Ustava, zakona, i drugih propisa koje donosi, te kako je Skupština Tuzlanskog kantona donijela Zakon o plaćama i naknadama policijskih službenika Tuzlanskog kantona („Službene novine Tuzlanskog kantona”, br: 16/22), u skladu sa ustavnim ovlaštenjima, i jedino je tijelo koje može (autentično) tumačiti njegove odredbe.

Pravni osnov za podnošenje prijedloga Vlade Tuzlanskog kantona za davanje autentičnog tumačenja odredaba zakona koje donosi Skupština Tuzlanskog kantona sadržan je u članu 165. stav (2) i članu 166. stav (1) Poslovnika Skupštine Tuzlanskog kantona („Službene novine Tuzlanskog kantona”, br. 13/19 i 5/20).

II. – RAZLOZI ZA DONOŠENJE AUTENTIČNOG TUMAČENJA

Osnovni razlog za davanje autentičnog tumačenja jeste omogućavanje Ministarstvu finansija da izvrše svoju obavezu utvrđenu Zakonom o trezoru Federacije BiH, Zakonom o budžetima Federacije BiH i Zakonom o izvršenju budžeta, te da putem centralizovanog obračuna i isplate plata i naknada pravilno i zakonito vrši isplatu plata i za policijske službenike.

Prepreka se sastoji u različitoj primjeni, odnosno tumačenju člana 6. i 7. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br. 16/22 -u daljem tekstu: Zakon), odnosno u problemu utvrđivanja momenta početka primjene osnovice za obračun plaća policijskih službenika u novoj fiskalnoj godini, a u kontekstu postojanja postignutog ili nepostignutog dogovora Vlade Tuzlanskog kantona i Sindikata policije MUP-a Tuzlanskog kantona i potpisanog ili nepotpisanog Sporazuma o visini osnovice za obračun plaće u smislu člana 6. Zakona.

III. – OBRAZLOŽENJE PRIJEDLOGA ZA DAVANJE AUTENTIČNOG TUMAČENJA

Vlada Tuzlanskog kantona uputila je Sindikatu policije MUP-a Tuzlanskog kantona Konačnu ponudu od 06.02.2024. godine za utvrđivanje elemenata za zaključivanje Sporazuma o utvrđivanju osnovice za obračun plate, iznosa povećanja plate, iznosa naknade za ishranu u toku rada (topli obrok), najniže plate iznosa naknade za korištenje godišnjeg odmora (regres) za zaposlene u oblasti policije MUP-a TK-a u 2024. godini, te iznosa pomoći, shodno Uredbi o isplati pomoći od strane poslodavaca.

Sindikat policije MUP-a Tuzlanskog kantona svojim aktom broj:S-45/24 od 07.2.2024. godine dostavio je odgovor na Konačnu ponudu, te se u alineji 1. Odgovora navodi:

“- U tački 1. predlaže se visina osnovice od 382,00 KM, a što je u suprotnosti sa članom 6. Zakona o platama i naknada policijskih službenika TK-a, jer neodražava visinu osnovice od 90 % od utvrđenog iznosa Federalne osnovice za obračun plata i naknada, kao i isplatu od 01.04.2024.godine, a što je u suprotnosti sa članom 7. Zakona o platama i naknadama policijskih službenika TKa, te se ovaj prijedlog ponude odbija.

Potrebno je da se visina osnovice uskladi sa Zakonom o plaćama i naknadama policijskih službenika TK-a, i to u visini od 382,50 KM, te da se za početak primjene isplate odredi 01.01.2024. godine, kao i da se nakon usvajanja Budžeta TK-a, razlika plate isplati retroaktivno, počevši od 01.01.2024. godine.”

Vlada Tuzlanskog kantona, analizirajući u saradnji sa Ministarstvom finansija član 6. Zakona, tumači, da u slučaju, da se osnovica iz člana 6. Zakona (od 90% od federalne osnovice), ne utvrdi prije donošenja budžeta Kantona za narednu fiskalnu godinu u smislu člana 7. stav (1) Zakona, dolazi do primjene člana 7. stav (2) zakona, tj. primjenjuje se, odnosno ostaje nasnazi osnovica iz prethodne fiskalne godine, sve do potpisivanja sporazuma o visini osnovice, a najduže 90 dana.

Konkretno, Vlada Tuzlanskog kantona i Sindikat policije MUP-a Tuzlanskog kantona nisu postigli dogovor o visini osnovice za 2024. godinu prije donošenja Budžeta Tuzlanskog kantona za 2024. godinu, tj. prije 21. februara 2024. godine, kada je održana sjednica Skupštine Tuzlanskog kantona na kojoj je donesen Budžet Tuzlanskog kantona za 2024. godinu.

Dakle, imamo situaciju da nije postignut dogovor i potpisan sporazum o visini osnovice za obračun plaće za 2024. godinu prije usvajanja Budžeta Tuzlanskog kantona za 2024. godinu, odnosno prije 21.02.2024. godine. te prema mišljenju Vlade Tuzlanskog kantona, dolazi do primjene člana 7. stav (2) Zakona, odnosno ranije utvrđena osnovica primjenjivat će se 90 dana, odnosno za period januar-mart 2024. godine.

Naime, na dan podnošenja prijedloga za davanje autentičnog tumačenja, još uvijek nije potpisan Sporazum o visini osnovice za obračun plaće, međutim, Vlada Tuzlanskog kantona je mišljenja, da je protekom roka od 90 dana, ispunjen uslov za primjenu visine osnovice od 90 % počev od 01.04.2024. godine., bez obzira na nepotpisivanje sporazuma.

Tumačenje Sindikata policije MUP-a Tuzlanskog kantona da se visina osnovice od 90 % federalne osnovice automatski primjenjuje od 01.01. svake fiskalne godine, smatramo neosnovanim, obzirom da takvim tumačenjem postaje suvišan član 7. Zakona.

Vlada Tuzlanskog kantona, tada kao predlagač Zakona, a Skupština Tuzlanskog kantona kao zakonodavni organ, prema mišljenju Vlade Tuzlanskog kantona, formulacijom člana 7. Zakona upravo su htjele da urede situaciju kada se sporazum o visini osnovice ne potpiše prije usvajanja budžeta za narednu fiskalnu.

To uređivanje situacije, uređeno je na način, da je Vlada Tuzlanskog kantona obavezna voditi računa o raspoloživim sredstvima u budžetu za potrebe plaća u smislu člana 7. stav (1) Zakona, a stavom (2) omogućiti pravo, koje ne može biti manje od onog iz prethodne fiskalne godine.

Važno je napomenuti da je članom 8. Zakona o plaćama i naknadama policijskih službenika Federacije BiH („Službene novine FBiH”, br: 45/10) utvrđeno:

- (1) Visina osnovice za obračun plaće utvrđuje se na osnovu najniže neto satnice dogovorene između Vlade Federacije i sindikata na način da se najniža neto satnica množi sa fondom radnih sati u mjesecu.
- (2) Osnovica iz stava 1. ovog člana za obračun plaće se utvrđuje prije donošenja budžeta za narednu fiskalnu godinu, a primjenjuje se od 1. januara za svaku narednu godinu koja se usklađuje sa Zakonom o budžetu, odnosno sa raspoloživim sredstvima za potrebe iz člana 3. ovog zakona.
- (3) Ukoliko se Vlada Federacije i sindikat ne dogovore o osnovici iz stava 1. ovog člana, ranije dogovorena osnovica ostaje na snazi do dogovora Vlade Federacije i sindikata a najduže 90 dana.

Analizirajući način primjene člana 6. Zakona kojim je utvrđeno da Vlada Tuzlanskog kantona, uz postignuti dogovor sa Sindikatom policije Ministarstva unutrašnjih poslova Tuzlanskog kantona, će utvrditi visinu osnovice od 90% u odnosu na obračun plaće iz člana 8. Zakona o plaćama i naknadama policijskih službenika Federacije Bosne i Hercegovine ("Službene novine Federacije BiH", broj: 45/10), postavlja se pitanje načina primjene člana 8. Federalnog zakona u kontekstu člana 6. zakona Tuzlanskog kantona.

Bukvalnom primjenom člana 6. Zakona potrebno je imati tačan podatak o najnižoj neto satnici dogovorenoj između Vlade Federacije i Federalnog sindikata policijskih službenika, a zatim primjeniti množenje fonda radnih sati na federalnom nivou, te izračunati 90% iznosa dobivenog množenjem.

Bez obzira na navedeno, Vlada Tuzlanskog kantona je mišljenja da ne postoji pravni osnov za isplatu plaće za period januar- mart 2024. godine u visini osnovice 382,00 KM ili 382,50 KM obzirom da ta visina osnovice nije utvrđena sporazumom prije donošenja Budžeta Tuzlanskog kantona za 2024. godinu.

Zbog svega naprijed navedenog, podnosilac smatra osnovanim dostavljeni prijedlog, te pradležemo da u što kraćem roku isti uputite nadležnim radnim tijelima Skupštine Tuzlanskog kantona na dalje postupanje.

IV. – FINANSIJSKA SREDSTVA

Za provođenje autentičnog tumačenja člana 6. i 7. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br.16/22) nije potrebno osigurati dodatna finansijska sredstva u Budžetu Tuzlanskog kantona, u suprotnom potrebno je dodatnih cca 1.350.000,00 KM u Budžetu Tuzlanskog kantona za 2024. godinu za period januar-mart, a obzirom na činjenicu da su za oblast obrazovanja potpisani sporazumi koji se vežu za eventualno povećanje osnovice drugih budžetskih korisnika u periodu januar-mart 2024. godine, tada bi dodatna sredstva iznosila cca 6.000.000,00 KM.



PREMIJER KANTONA

Irfan Halilagić

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona”, br. 7/97 i 3/99 i „Službene novine Tuzlanskog kantona”, br. 13/99, 10/00, 14/02, 6/04 i 10/04) i člana 169. stav (1) Poslovnika Skupštine Tuzlanskog kantona („Službene novine Tuzlanskog kantona”, br. 13/19 i 5/20), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____ 2024. godine, donosi

AUTENTIČNO TUMAČENJE

ČLANA 6. i 7. ZAKONA O PLAĆAMA I NAKNADAMA POLICIJSKIH SLUŽBENIKA TUZLANSKOG KANTONA („Službene novine Tuzlanskog kantona”, br. 16/22)

1. Sporazum potpisan između Vlade Kantona i Sindikata o utvrđivanju visine osnovice za obračun plaća policijskih službenika predstavlja isključivi pravni osnov kojim se uređuje pitanje visine osnovice za svaku fiskalnu godinu u smislu člana 6. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br. 16/22).
2. Osnovicom iz člana 7. stav (1) Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br. 16/22) podrazumjeva se osnovica utvrđena i potpisana u sporazumu prije donošenja budžeta za narednu fiskalnu godinu u skladu sa rokovima donošenja budžeta utvrđenim Zakonom o budžetima u Federaciji Bosne i Hercegovine („Službene novine Federacije BiH”, br. 102/13, 9/14, 13/14, 8/15, 91/15, 102/15, 94/16, 5/18, 11/19, 99/19 i 25a/22), tj. najkasnije do 31. decembra tekuće fiskalne godine za narednu fiskalnu godinu.
3. Osnovica iz člana 7. stav (2) Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br. 16/22) podrazumjeva osnovicu iz prethodne fiskalne godine sa rokom primjene najduže 90 dana u narednoj fiskalnoj godini, a u slučaju da nije postignut dogovor o visini osnovice za narednu fiskalnu godinu i potpisan sporazum, niti nakon isteka roka od 90 dana, primjenjuje se visina osnovice iz člana 6. Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br. 16/22).
4. Autentično tumačenje predstavlja integralni dio teksta ovog zakona, te se shodno primjenjuje od stupanja na snagu Zakona o plaćama i naknadama policijskih službenika Tuzlanskog kantona („Službene novine Tuzlanskog kantona”, br. 16/22) i bit će objavljeno u “Službenim novinama Tuzlanskog kantona”.

Bosna i Hercegovina
Federacija Bosne i Hercegovine
TUZLANSKI KANTON
Skupština

Predsjednik
Skupštine Tuzlanskog kantona

Žarko Vujović, v.r.

Broj:
Tuzla,



SLUŽBENE NOVINE TUZLANSKOG KANTONA

GODINA 29 • TUZLA, ČETVRTAK, 08. SEPTEMBAR 2022. GODINE • IZDANJE NA BOSANSKOM JEZIKU • BROJ 16

854

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.8.2022. godine, donosi

ZAKON

O PLAĆAMA I NAKNADAMA POLICIJSKIH SLUŽBENIKA TUZLANSKOG KANTONA

DIO PRVI – OSNOVNE ODREDBE

Član 1.

(Predmet zakona)

Ovim zakonom uređuju se plaće, platni razredi i koeficijenti za platne razrede, naknade kao i druga pitanja koja se odnose na primanja policijskih službenika Uprave policije Ministarstva unutrašnjih poslova Tuzlanskog kantona (u daljem tekstu: Uprava policije).

Član 2.

(Definicije pojmova korištenih u Zakonu)

Pojmovi korišteni u ovom zakonu imaju sljedeće značenje:
a) „policijski službenik“ je pripadnik Uprave policije koji je ovlašten da primjenjuje policijska ovlaštenja propisana Zakonom o policijskim službenicima Tuzlanskog kantona - prečišćeni tekst („Službene novine Tuzlanskog kantona“, broj: 7/22, u daljem tekstu: Zakon o policijskim službenicima) i postupa kao ovlašteno službeno lice prema zakonima o krivičnom postupku u Bosni i Hercegovini,

b) „radno mjesto“ je pozicija na koju se raspoređuje policijski službenik utvrđena Pravilnikom o unutrašnjoj organizaciji Ministarstva unutrašnjih poslova Tuzlanskog kantona (u daljem tekstu: Pravilnik o unutrašnjoj organizaciji),

c) „osnovica za obračun plaće“ predstavlja novčani iznos u konvertibilnim markama (u daljem tekstu: KM) koji se koristi za određivanje osnovne plaće,

d) „platni razred“ predstavlja razvrstavanje radnih mjesta prema činu, utvrđenih u Pravilniku o unutrašnjoj organizaciji, radi određivanja iznosa osnovne plaće policijskog službenika,

e) „koeficijent“ predstavlja brojčanu vrijednost koja se iskazuje arapskim brojevima za svaku poziciju radnog mjesta koje je razvrstano u platne razrede Uprave policije za utvrđivanje visine osnovne plaće,

f) „puno radno vrijeme policijskog službenika“ je 40 sati sedmično,

g) „noćni rad“ je rad između 22 sata uvečer i 07 sati ujutro,

h) „prekovremeni rad“ je rad duži od punog radnog vremena, utvrđen Zakonom o policijskim službenicima.

Član 3.

(Finansijska sredstva)

Finansijska sredstva za plaće, naknade i druga primanja policijskih službenika predviđena ovim zakonom planiraju se i osiguravaju se u Budžetu Tuzlanskog kantona (u daljem tekstu: Budžet Kantona).

Član 4.

(Načela)

Pri određivanju iznosa plaće i naknada za policijske službenike poštivat će se sljedeća načela:

a) isti koeficijent za isti čin policijskog službenika

b) transparentnost: prilikom objavljivanja javnog konkursa ili oglasa za popunu slobodnih radnih mjesta policijskog službenika obavezno se objavljuje podatak o pripadajućoj osnovnoj neto plaći za oglašena radna mjesta.

DIO DRUGI – PLAĆE I DODACI

Član 5.

(Bruto i neto plaća)

(1) Plaća policijskog službenika utvrđuje se u bruto i neto iznosu.

(2) Plaća u bruto iznosu obuhvata neto plaću, poreze i doprinose.

(3) Neto plaća predstavlja iznos osnovne plaće uvećane za dodatke i naknade iz člana 9. stavovi (2) i (3) ovog zakona.

Član 6.

(Osnovica za obračun plaće policijskih službenika)

Vlada Tuzlanskog kantona (u daljem tekstu: Vlada Kantona), uz postignuti dogovor sa Sindikatom policije Ministarstva unutrašnjih poslova Tuzlanskog kantona (u daljem tekstu: Sindikat), će utvrditi visinu osnovice od 90% u odnosu na obračun plaće iz člana 8. Zakona o plaćama i naknadama policijskih službenika Federacije Bosne i Hercegovine („Službene novine Federacije BiH“, broj: 45/10), o čemu Vlada Kantona i Sindikat potpisuju sporazum.

Član 7.

(Način utvrđivanja osnovice za obračun plaće)

(1) Osnovica iz člana 6. ovog zakona utvrđuje se prije donošenja Budžeta Kantona za narednu fiskalnu godinu, a primjenjuje se od 01. januara za svaku narednu godinu, koja se usklađuje sa Zakonom o izvršenju budžeta Tuzlanskog kantona, odnosno sa raspoloživim sredstvima za potrebe iz člana 3. ovog zakona.

(2) Ukoliko Vlada Kantona i Sindikat ne utvrde osnovicu iz stava (1) ovog člana, ranije utvrđena osnovica ostaje na snazi do potpisivanja sporazuma između Vlade Kantona i Sindikata, a najduže 90 dana.

Član 8.**(Osnovna plaća)**

(1) Osnovnu plaću policijskog službenika određuje osnovica iz člana 6. ovog zakona pomnožena sa koeficijentom platnog razreda iz člana 10. ovog zakona.

(2) Osnovna plaća obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.

(3) Osnovna plaća policijskog službenika ne može biti manja od 70% od prosječne neto plaće isplaćene u Federaciji Bosne i Hercegovine (u daljem tekstu: Federacija) prema posljednjem objavljenom statističkom podatku.

(4) U slučaju da množenjem utvrđene osnovice i pripadajućeg koeficijenta osnovna plaća iznosi manje od 70% od prosječne plaće iz stava (3) ovog člana, policijskom službeniku će se isplatiti plaća u iznosu iz stava (3) ovog člana.

(5) Ukoliko policijski službenik koristi određena prava iz radnog odnosa, koja uključuju rad sa polovinom radnog vremena, istom će se plaća i naknada plaće odrediti u skladu sa propisima o radu i socijalnoj zaštiti kojima je bliže uređena navedena oblast.

(6) Izuzetno, ukoliko je policijski službenik privremeno raspoređen na radno mjesto za koje je propisan viši čin od onog koji policijski službenik ima, osnovna plaća tog policijskog službenika, za taj period se određuje tako što se osnovica za obračun plaće iz člana 6. ovog zakona pomnoži sa koeficijentom propisanim za čin i radno mjesto na koje je policijski službenik privremeno raspoređen.

Član 9.**(Plaća i dodatak na plaću)**

(1) Plaća policijskog službenika veže se uz njegov čin.

(2) Sastavni dio plaće policijskog službenika čini osnovna plaća iz člana 8. stav (1) ovog zakona, poseban dodatak na plaću iz člana 11. ovog zakona i naknada iz člana 18. ovog zakona.

(3) Plaća iz stava (2) ovog člana povećava se za 0,5% za svaku punu godinu staža osiguranja, s tim da ukupno povećanje po ovom osnovu ne može biti veće od 20%.

Član 10.**(Platni razredi, činovi i koeficijenti za policijske službenike)**

Koeficijent za obračun plaće policijskog službenika utvrđuje se prema platnom razredu koji je vezan za čin, i to:

PLATNI RAZREDI	ČINOVI	KOEFICIJENTI
I	Generalni inspektor policije	6,95
II	Glavni inspektor	5,90
III	Samostalni inspektor	4,90
IV	Viši inspektor	4,30
V	Inspektor	4,00
VI	Mlađi inspektor	3,60
VII	Stariji narednik	3,30
VIII	Narednik	3,10
IX	Stariji policajac	2,90
X	Policajac	2,70

Član 11.**(Poseban dodatak na plaću)**

(1) Policijski službenik ima pravo na poseban dodatak na plaću u iznosu od 30% od osnovne plaće policijskog službenika.

(2) Policijski službenik raspoređen na poslove i zadatke u Jedinici policije za specijalnu podršku ima pravo na poseban dodatak na plaću u iznosu od 40% od osnovne plaće policijskog službenika.

(3) Policijski službenik, pripadnik Jedinice policije za sprječavanje narušavanja javnog reda i mira u većem obimu, ima pravo na poseban dodatak na plaću u iznosu od 35% od osnovne plaće policijskog službenika.

(4) Uz dodatak iz stava (1) ovog člana, u posebnim okolnostima, direktor Uprave policije može utvrditi veći trajni dodatak za pojedina radna mjesta, a za radno mjesto direktora Uprave policije veći trajni dodatak će odrediti ministar unutrašnjih poslova Tuzlanskog kantona (u daljem tekstu: ministar). Taj dodatak iznosi 10% od osnovne plaće policijskog službenika.

Član 12.**(Jednokratni dodatak na plaću)**

(1) Na osnovu izvanrednih i objektivno ocijenjenih radnih rezultata policijskog službenika, direktor Uprave policije može odlučiti o jednokratnom dodatku na plaću tom službeniku u iznosu do 30% od osnovne plaće.

(2) Dodatak iz stava (1) ovog člana može se isplatiti policijskom službeniku dva puta u toku jedne kalendarske godine.

(3) Odluka o isplati dodatka iz stava (1) ovog člana objavljuje se na oglasnoj ploči Ministarstva unutrašnjih poslova Tuzlanskog kantona.

(4) Detaljnije odredbe o dodatku na osnovu izvanrednih i objektivno ocijenjenih radnih rezultata propisuje ministar na prijedlog direktora Uprave policije.

Član 13.**(Pravo na naknadu za policijske službenike u kriminalističkoj policiji i Jedinici za profesionalne standarde)**

(1) Policijski službenik koji je rješenjem raspoređen u Sektoru kriminalističke policije, u Odjeljenju kriminalističke policije u policijskim upravama i Jedinici za profesionalne standarde Uprave policije, te radnim mjestima za policijske službenike za koje je Pravilnikom o unutrašnjoj organizaciji predviđen rad u civilnoj odjeći, ima pravo na naknadu u iznosu od 30% od prosječne neto plaće isplaćene u Federaciji za prethodnu godinu, u svrhu kupovine civilne odjeće.

(2) Naknada iz stava (1) ovog člana utvrđuje se rješenjem direktora Uprave policije i isplaćuje se istom policijskom službeniku jednom godišnje, u posljednjem kvartalu budžetske godine.

DIO TREĆI – OBRAČUN I ISPLATA PLAĆE I NAKNADE**Član 14.****(Način obračuna i isplate plaće)**

(1) Plaća policijskog službenika se obračunava za prethodni mjesec, a isplaćuje u tekućem mjesecu u skladu sa Zakonom o radu („Službene novine Federacije BiH“, br. 26/16, 89/18, 23/20, 49/21 – završne odredbe Zakona o mirnom rješavanju radnih sporova, 103/21 – završne odredbe Zakona o reprezentativnosti sindikata i udruženja poslodavaca, 31/22 i 44/22) i Zakonom o izvršenju budžeta Tuzlanskog kantona, u periodima isplate koji ne mogu biti duži od 30 dana.

(2) Plaća iz stava (1) ovog člana utvrđuje se rješenjem koje donosi direktor Uprave policije.

(3) Rješenje iz stava (2) ovog člana sadrži lične podatke policijskog službenika, čin, platni razred i sve elemente koji su uzeti u obzir za utvrđivanje visine plaće.

(4) Podaci o plaćama policijskih službenika su javni, dok pisani obračuni pojedinačnih isplata plaća nisu javni.

Član 15.**(Naknada zbog privremene spriječenosti za rad)**

(1) Policijski službenik ima pravo na naknadu plaće za vrijeme privremene spriječenosti za rad (bolovanje) do 42 kalendarska dana u visini njegove neto plaće iz prethodnog mjeseca.

(2) Naknade plaće za vrijeme privremene spriječenosti za rad preko 42 dana ostvaruje se u skladu sa posebnim propisom Tuzlanskog kantona kojim se uređuje naknada za ovo bolovanje.

Član 16.

(Naknada za slučaj teške bolesti ili invalidnosti)

U slučaju nastanka teške bolesti ili invalidnosti policijskog službenika ili člana njegove uže porodice, isplaćuje se jednokratna novčana pomoć u visini od jedne prosječne neto plaće isplaćene u Federaciji prema posljednjem objavljenom statističkom podatku.

Član 17.

(Naknada za porodijsko odsustvo)

Policijski službenik za vrijeme porodijskog odsustva ima pravo na naknadu plaće prema propisima Tuzlanskog kantona kojim se uređuje ova oblast, prema mjestu uplate doprinosa s tim da razliku do visine pune plaće uplaćuje Uprava policije u kojoj se policijski službenik nalazi u radnom odnosu.

Član 18.

(Naknada za prekovremeni rad, rad u neradne dane, noćni rad i rad u dane državnih praznika)

(1) U slučaju prekovremenog rada, noćnog rada, rada u dane sedmičnog odmora i rada u dane državnih praznika, policijski službenik ima pravo na naknadu osnovne plaće srazmjerno vremenu trajanja tog rada, uvećanu za:

a) prekovremeni rad u periodu od 22,00 do 07,00 sati 40% i prekovremeni rad u periodu od 07,00 do 22,00 sati 30%,

b) noćni rad 40%,

c) rad u dane sedmičnog odmora 30% i

d) rad u dane državnih praznika 50%.

(2) Obračun naknade iz stava (1) ovog člana vrši se od osnovne plaće.

(3) Policijski službenik čiji je raspored rada organizovan u turnusima-smjenama, nema pravo na naknadu za redovan rad u dane vikenda (subota i nedjelja), izuzev naknade za rad u dane državnih praznika, naknade za rad u dane svog sedmičnog odmora, za noćni rad i prekovremeni rad.

(4) U prekovremeni rad ne ulazi noćni rad.

Član 19.

(Naknada za privremeni interni premještaj)

(1) Policijski službenik koji je prema odredbama Zakona o policijskim službenicima premješten na drugo radno mjesto koje je 60 km ili više udaljeno od njegovog trenutnog radnog mjesta ili mjesta prebivališta ima pravo da uz osnovnu plaću koja je određena u skladu sa članom 8. stav (1) ovog zakona i pravo na naknadu za privremeni interni premještaj u iznosu i na način koji Vlada Kantona utvrdi posebnim propisom za policijske službenike, koja se sastoji od:

a) naknade troškova za odvojeni život i

b) naknade za odgovarajući smještaj.

(2) Pravo na naknadu iz stava (1) ovog člana ne ostvaruje policijski službenik koji je premješten po ličnom zahtjevu, kao i policijski službenik koji je prvi put raspoređen na radno mjesto.

Član 20.

(Otpremnina u slučaju otpusta zbog prekobrojnosti policijskih službenika)

(1) U slučaju da do prestanka radnog odnosa policijskog službenika dolazi zbog prekobrojnosti, takav policijski službenik koji ima do 15 godina staža osiguranja ima pravo na otpremninu koja odgovara iznosu plaće koju je primio u vrijeme kada je proglašen prekobrojnim, uvećane devet puta.

(2) Otpremnina iz stava (1) ovog člana iznosi 12 mjesečnih plaća za policijske službenike koji imaju preko 15 godina staža osiguranja kao policijski službenici.

Član 21.

(Naknada za troškove sahrane i za slučaj smrti)

(1) Policijski službenik koji u toku vršenja dužnosti izgubi život, sahranjuje se u mjestu koje odrede članovi njegove uže porodice na trošak Uprave policije, koji se sastoji od sljedećeg:

a) prijevoz posmrtnih ostataka na mjesto ukopa,

b) putne troškove za dva prateća lica,

c) trošak za grobnicu, ukoliko nije već osigurana na drugi način i

d) druge uobičajne troškove u iznosu koji određuje Uprava policije.

(2) Porodica koju je preminuli policijski službenik iz stava (1) ovog člana izdržavao, ima pravo na jednokratnu finansijsku pomoć u iznosu posljednje neto plaće koju je policijski službenik ostvario uvećane šest puta.

(3) U slučaju smrti policijskog službenika van vršenja službene dužnosti, porodici policijskog službenika koju je izdržavao, isplaćuju se troškovi sahrane u visini od tri prosječne neto plaće isplaćene u Federaciji prema posljednjem objavljenom statističkom podatku.

(4) U slučaju smrti člana uže porodice, policijskom službeniku isplaćuje se naknada u visini od dvije prosječne neto plaće isplaćene u Federaciji prema posljednjem objavljenom statističkom podatku.

(5) Ukoliko u Upravi policije rade dva ili više članova porodice, troškovi sahrane iz stava (3) ovog člana isplaćuju se samo jednom zaposlenom članu porodice.

Član 22.

(Članovi uže porodice)

Članom uže porodice policijskog službenika smatraju se:

- bračni i vanbračni partner,

- dijete (bračno, vanbračno, usvojeno, pastorče i dijete bez roditelja uzeto na izdržavanje do 18. godine, odnosno do 26. godine života ako se nalazi na redovnom školovanju i nije u radnom odnosu, te djeca nesposobna za rad bez obzira na dob),

- roditelji (otac, majka, očuh, maćeha i usvojilac) i

- braća i sestre bez roditelja do 18., odnosno do 26. godine ako se nalaze na redovnom školovanju i nemaju drugih prihoda, već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na dob, pod uslovom da sa njima živi u zajedničkom domaćinstvu, i unučad ako nemaju roditelja i žive u zajedničkom domaćinstvu sa policijskim službenikom.

Član 23.

(Pravo na osiguranje od posljedica nesretnog slučaja)

(1) Policijski službenik ima pravo na osiguranje od posljedica nesretnog slučaja s uključenim rizikom od prirodne smrti za vrijeme trajanja radnog odnosa.

(2) Visina osiguranja po ovoj osnovi određuje se prema polisi osiguranja od posljedica nesretnog slučaja, odnosno polisi osiguranja od prirodne smrti.

(3) Ugovor o osiguranju sa odgovarajućom osiguravajućom kućom zaključuje direktor Uprave policije za sve policijske službenike u Tuzlanskom kantonu u skladu sa Kolektivnim ugovorom za policijske službenike Ministarstva unutrašnjih poslova Tuzlanskog kantona (u daljem tekstu: Kolektivni ugovor).

(4) Policijski službenik, odnosno njegovi zakonski nasljednici, sva prava iz stavova (1) i (2) ovog člana ostvaruje kod osiguravajuće kuće sa kojom je zaključen ugovor od strane Uprave policije.

Član 24.

(Naknada za prijevoz na posao i sa posla)

Policijskom službeniku koji nije u mogućnosti iz opravdanih razloga da koristi osiguran prijevoz na posao i sa posla, a čije

je mjesto stanovanja od mjesta rada udaljeno najmanje dva kilometra, pripada karta za prijevoz ili naknada za troškove prijevoza u visini cijene dnevne (relacijske) karte najjeftinijeg prijevoza kojim se osigurava nesmetan redovan dolazak i odlazak policijskog službenika na posao i sa posla, za svaki dan kada je prisutan na poslu, a maksimalno do iznosa cijene mjesečne karte za prijevoz u javnom saobraćaju na relacijama na kojima putuje.

Član 25.

(Naknada za ishranu tokom rada)

(1) Policijski službenik ima pravo na naknadu za ishranu u toku rada (topli obrok) u iznosu od 1% prosječne neto plaće u Federaciji prema posljednjem objavljenom statističkom podatku.

(2) Izuzetno od stava (1), policijski službenik raspoređen u Jedinicu policije za specijalnu podršku ima pravo na naknadu za ishranu (topli obrok) i naknadu za pojačanu ishranu u toku rada u iznosu od 2% prosječne neto plaće u Federaciji prema posljednjem objavljenom statističkom podatku.

(3) Policijski službenik raspoređen u Jedinicu policije za sprječavanje narušavanja javnog reda i mira u većem obimu ima pravo na naknadu za ishranu (topli obrok) i naknadu za pojačanu ishranu u toku rada u iznosu od 1,5% prosječne neto plaće u Federaciji prema posljednjem objavljenom statističkom podatku.

(4) Pravo na naknadu iz stavova (1), (2) i (3) ovog člana ne ostvaruje se u slučaju odsustva sa posla po bilo kojem osnovu (godišnji odmor, plaćeno odsustvo, neplaćeno odsustvo, službeno putovanje i sl.).

Član 26.

(Regres)

(1) Policijski službenik ima pravo na naknadu na ime regresa za korištenje godišnjeg odmora u visini od 50% prosječne neto plaće isplaćene u Federaciji prema posljednjem objavljenom statističkom podatku.

(2) Pravo na regres iz stava (1) ovog člana ima svaki policijski službenik koji u toku tekuće kalendarske godine ima pravo na godišnji odmor.

Član 27.

(Otpremnina)

Policijski službenik ima pravo na otpremninu prilikom odlaska u penziju u iznosu posljednje neto plaće koju je ostvario uvećane šest puta.

Član 28.

(Naknada za službeni put)

(1) Policijski službenik ima pravo na naknadu za troškove službenog putovanja.

(2) Za određivanje visine i uslova za ostvarivanje naknade za troškove službenog putovanja, primjenjuje se propis kojim je uređeno navedeno pitanje za državne službenike i namještenike u organima uprave u Tuzlanskom kantonu.

Član 29.

(Druge naknade)

Policijski službenik ima pravo i na druge naknade utvrđene Kolektivnim ugovorom.

DIO ČETVRTI - DONOŠENJE PODZAKONSKOG PROPISA I RJEŠENJA

Član 30.

(Donošenje Pravilnika o plaćama i naknadama)

Ministar će, na prijedlog direktora Uprave policije, donijeti Pravilnik o plaćama i naknadama policijskih službenika u roku od 60 dana od dana stupanja na snagu ovog zakona, uz saglasnost Ministarstva finansija Tuzlanskog kantona.

Član 31.

(Donošenje rješenja)

(1) Naknade i druga materijalna prava predviđena u odredbama članova: 11., 16., 17., 18. stav (1) tačka a), 19., 20., 21., 24., 26. i 27. ovog zakona ostvaruju se donošenjem rješenja.

(2) Rješenja iz stava (1) ovog člana donosi direktor Uprave policije.

DIO PETI – NADZOR NAD PRIMJENOM I KAZNE NE ODREDBE

Član 32.

(Nadzor nad primjenom ovog zakona)

Nadzor nad primjenom ovog zakona vrši Ministarstvo unutrašnjih poslova Tuzlanskog kantona i Ministarstvo finansija Tuzlanskog kantona, svako u okviru svojih nadležnosti.

Član 33.

(Kazne za prekršaje)

Novčanom kaznom u iznosu od 500,00 KM do 2.000,00 KM bit će kažnjen za prekršaj direktor Uprave policije ako:

- ne odredi plaću policijskom službeniku u skladu sa njegovim činom (član 9. stav (1));
- ne odredi dodatak na plaću u skladu sa članom 11. ovog zakona;
- ne donese rješenje o plaći (član 14. stav (2));
- odredi naknade suprotno članovima 15. do 29. ovog zakona;
- ako ne predloži donošenje propisa (član 30.).

DIO ŠESTI - PRIJELAZNE I ZAVRŠNE ODREDBE

Član 34.

(Usklađivanje Kolektivnog ugovora)

Vlada Kantona i Sindikat dužni su uskladiti odredbe Kolektivnog ugovora sa ovim zakonom u roku od tri mjeseca od dana stupanja na snagu ovog zakona.

Član 35.

(Prijelazna odredba o plaćama)

(1) Policijskom službeniku kojem stupanjem na snagu ovog zakona bude u istom činu obračunata niža plaća od one na koju je imao pravo na dan prije stupanja na snagu ovog zakona, dodjeljuje se dodatak jednak razlici ranije plaće i plaće obračunate u skladu sa ovim zakonom.

(2) Policijskom službeniku sa dodijeljenim činom generalni inspektor policije nakon stupanja na snagu ovog zakona, dodijelit će se dodatak jednak razlici plaće utvrđene za čin generalni inspektor policije prema propisu koji je važio do dana stupanja na snagu ovog zakona i plaće obračunate po ovom zakonu.

(3) Pravo na dodatak iz stava (2) ovog člana pripada policijskom službeniku sve dok razlika u plaći ne bude pokrivena budućim povećanjima njegove osnovne plaće.

Član 36.

(Prestanak primjene odredbi drugih propisa)

Danom stupanja na snagu ovog zakona prestaju da važe:

- Odredbe Zakona o policijskim službenicima koje se odnose na plaće, dodatke na plaću, naknade i ostala materijalna primanja, ako su drugačije uređena ovim zakonom i
- Uredba o plaćama i naknadama plaća policijskih službenika Tuzlanskog kantona („Službene novine Tuzlanskog kantona“, br. 14/06, 4/07, 6/07, 2/08, 4/08, 11/09, 4/12, 5/18, 5/19 i 8/19).

Član 37.

(Postupci u toku)

Svi predmeti koji su u postupku rješavanja, rješavat će se u skladu sa propisima koji su važili do donošenja ovog zakona, ako je povoljniji za policijskog službenika.

Član 38.**(Stupanje na snagu)**

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

Bosna i Hercegovina
-Federacija Bosne i Hercegovine-
TUZLANSKI KANTON
Skupština

Predsjednik
Skupštine Tuzlanskog kantona

Broj: 01-02-360-9/22
Tuzla, 30.8.2022. godine

Žarko Vujović, v.r.

855

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.8.2022. godine, donosi

ZAKON**O IZMJENAMA I DOPUNAMA ZAKONA
O NAUČNOISTRAŽIVAČKOM RADU****Član 1.**

U Zakonu o naučnoistraživačkom radu („Službene novine Tuzlanskog kantona“, br. 14/17 i 8/21) u članu 16. u stavu (1) u tački b) iza riječi „Hercegovine“ dodaju se riječi „(u daljem tekstu: ANU BiH)“.

Stav (3) mijenja se i glasi:

„(3) Za svaku budžetsku godinu Ministarstvo donošenjem posebne odluke, uz prethodnu saglasnost Vlade Kantona, određuje programe iz stava (1) ovog člana koji će se sufinansirati iz budžeta Kantona.“

Iza stava (3) dodaje se novi stav (4), koji glasi:

„(4) Za ostvarivanje programa iz stava (1) ovog člana, uz prethodnu saglasnost Vlade Kantona, ministar bliže utvrđuje uslove, kriterije i postupak dodjele sredstava iz budžeta Kantona za svaki pojedini program.“

Član 2.

U članu 17. u stavu (1) riječi „Akademija nauka i umjetnosti Bosne i Hercegovine“ zamjenjuju se riječima „ANU BiH“.

Član 3.

U članu 39. u stavu (2) riječ „četiri“ zamjenjuje se riječju „dva“, a riječ „dva“ zamjenjuje se riječju „jednog“.

Član 4.

U članu 99. stavovi (2) i (3) mijenjaju se i glase:

„(2) Sredstva za ostvarivanje programa iz člana 16. ovog zakona osiguravaju se u budžetu Kantona u minimalnom iznosu od 0,05% prihoda budžeta Kantona, koji ne uključuje primitke od finansijske imovine i zaduživanja kao ni vlastite i namjenske prihode budžetskih korisnika.

(3) Iz sredstava iz stava (2) ovog člana isplaćuju se i naknade predsjednika i članova Kantonalnog savjeta.“

Član 5.

U članu 103. u stavu (1) iza riječi „konkurs“ dodaju se riječi „, sa izuzetkom programa koji se odnose na naučnoistraživački rad ANU BiH čiji programi se sufinansiraju iz budžeta Kantona bez raspisivanja konkursa, u skladu sa posebnom odlukom koju donosi Vlada Kantona, a kojom se utvrđuju uslovi, kriteriji i postupak dodjele sredstava iz budžeta Kantona na ime sufinansiranja programa naučnoistraživačkog rada ANU BiH“.

Član 6.**(Planiranje sredstava u Budžetu Tuzlanskog kantona
za naučnoistraživački rad)**

Planiranje sredstva u Budžetu Tuzlanskog kantona za ostvarivanje programa u naučnoistraživačkom radu i tehnološkom razvoju u skladu sa članom 4. ovog zakona vršit će se najkasnije počev od budžetske 2023. godine.

Član 7.**(Stupanje na snagu)**

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“.

Bosna i Hercegovina
-Federacija Bosne i Hercegovine-
TUZLANSKI KANTON
Skupština

Predsjednik
Skupštine Tuzlanskog kantona

Broj: 01-02-465-4/22
Tuzla, 30.8.2022. godine

Žarko Vujović, v.r.

856

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 30.8.2022. godine, donosi

ZAKON**O IZMJENAMA I DOPUNAMA ZAKONA O
VISOKOM OBRAZOVANJU****Član 1.**

U Zakonu o visokom obrazovanju – prečišćeni tekst („Službene novine Tuzlanskog kantona“, br. 21/21, 22/21, 5/22 i 11/22), u članu 9. u stavu (4) tačka e) mijenja se i glasi: „e) analizira i daje mišljenje o propisima iz oblasti visokog obrazovanja, te daje prijedloge za izmjene/dopune istih.“

Član 2.

U članu 20. u stavu (1) riječ „Vlada“ zamjenjuje se riječju „Skupština“.

Član 3.

U članu 21. u stavu (1) riječ „Vlada“ zamjenjuje se riječju „Skupština“.

Stav (2) briše se.

Dosadašnji stavovi (3), (4) i (5) postaju stavovi (2), (3) i (4).

U dosadašnjem stavu (3), koji postaje stav (2), iza riječi „Kantona“ dodaju se riječi „za javnu visokoškolsku ustanovu“.

Član 4.

U članu 23. iza stava (5) dodaje se novi stav (6), koji glasi: „(6) Zahtjev za donošenje rješenja iz stava (1) ovog člana se ne može podnijeti dok se ne riješe sva prethodna pitanja bez čijeg rješenja se ne može riješiti pitanje ispunjenosti uslova za početak rada i obavljanje djelatnosti visokog obrazovanja (nadležni organ nije odlučio o pitanju postojanja potrebe za osnivanjem nove visokoškolske ustanove, nadležni organ nije usvojio elaborat, imenovanje ili rad komisije matičara nije provedeno u skladu sa ovim zakonom i sl.)“.

Dosadašnji stavovi (6), (7), (8) i (9) postaju stavovi (7), (8), (9) i (10).

U dosadašnjem stavu (8), koji postaje stav (9), broj „(7)“ zamjenjuje se brojem „(8)“.